

`S schenschi Alter

Als unser Herrgott hat entschiede,
De Mensch als Ebenbild zu schaffe,
Ware alli Engel recht zufriede:
Sie hann jetz wiedr was zu gaffe.

Gott Vatr froot die Engelschar,
Wie lang er sollt' bestimme
Seiner Mensche Lebensjahr:
Die gude un die schlimme.

Die Antworte - wie sonderbar -
Uff des Schepfers wichtich Frog',
Verschiede, wie die Engle war':
De Herrgott hat se alli gewog'.

Um ke'm Engl weh zu tun,
Hat'r bekannt gen sei Entschluß,
Daß e jedes Alter nun
Ihm Engle liefre muß.

So war's allmol vun Anfang klor,
Daß's schenschi Alter norr kann sinn,
E jed's erlebt Lebensjohr,
Wann's richtich fließt dahin.

Die Zeit vun Null bis Zehn
Iss mr behit' gar gut;
Die Zeit is wirklich scheen,
Weil alles noch ti Muttr tut.

Zwischen Zehn un Zwanzich - heert -
De Bu so langsam werd' zum Mann;
Wann'r sich aach oft empeert,
Des Alter mr vertraan noch kann.

Die zehn Johr zwischen Zwanzich und Dreissich
Sinn Weib un Mann in des Lebens Blite;
Sie sinn aach jetz besonders fleissich:
Neu' Lewe kummt aus ihrer Mitte.

Bis Verzicht staat de Sturm sich leet,
Des Alter kennt ke Hindernis;
Un dort, wu mr sich gut vrsteht,
Des Lewe eitel Wonne iss.

Bei Verzicht iss es aach so weit:
Es fangt des weisi Alter an,
Un jedr, der bis jetz net gescheit,
Bis Fuffzich 's ach net schaffe kann.

Un wann's erscht geht uff Sechzich zu -
Die dritti Blit werd's oft genannt -
So mancher find' grad jetz ke Ruh
Un sucht e zarti Hand.

Was in di Zeit bis Siebzich fallt,
Werd forr di meeschte e Genuss;
Mr kriet Pension un is net alt,
Norr g'sund mr bleiwe muss.

Es reihe sich jetz Johre an,
Wu mancher langsam wacklich werd'.
Doch wann mr esse un trinke kann,
Iss's Lewe erscht was wert.

Bei neinzich iss schun Ultimo,
Fast jedr Baam werd jetz geknickt.
Es iss e Wohltat, wann drno
Die Seel' zum Herrgott uffwärts blickt.

Die nächschte Johr bis "Hunnert"
Sinn gar dinn gesät;
Ich wär gar net verwunnert,
Wann ich's noch erlewe tät.

Was is nun 's beshti Alter?
Die Antwort will ich genn:
De Mensch iss de Gestalter -
E jedes Alter is scheen!

Matthias Weber